

## Faaineineraa no te maiti i te tiamaraa i Nouvelle-Calédonie.



Photo : Ralph Teinaore

De retour d'une réunion de la CEVAA (Communauté Internationale d'Églises Protestantes) en Nouvelle-Calédonie, Ralph Teinaore a rencontré l'Église évangélique de Nouvelle-Calédonie et aux îles Loyautés. L'engagement de l'EENC pour l'indépendance du peuple Kanak n'a pas plu à tout le monde. Les accords de Matignon en 1988 lui ont permis de jouer pleinement son rôle de dialogue et de continuer sa réflexion. Certains attendent, d'autres appréhendent le référendum d'auto-détermination en 1988. Personne ne veut revivre les événements des années 80. S'il y a un perdant, l'acceptera-t-il ? S'il y a un gagnant, n'en profitera-t-il pas ? La Nouvelle-Calédonie est-elle préparée à son avenir et aux choix à faire ?

**M**ai te 4 e tae atu i te 16 no Fepuare 1996, ua tupu na te Apooraa a te Tomite Faatere a te Cevaa i te fenua Taratoni i te mateinaa no Païta i Kaala-Gomen. Ia au mai te mau matahiti atoà, e rave rahi mau tāpura ōhipa i arataihia i te taime no te putuputuraa a te Tomite Faatere. E tiā ia parau e te vai nei te mau tumu parau tei mātaro-noa-hia e no teie matahiti te tumu parau rahi tei hiōhia o ia hoī o te faaineineraa ia i te Apooraa Rahi Taaē o te tupu i Itaria i te avāe Tiunu 96. A taa noa atu ai te reira te vai atoà ra te mau tuatapararaa tei aratai-atoā-hia i niā i te oraraa o te fenua e o te Etaretia Evaneria i Taratoni, o tel riro atoà ei mero tumu no te Cevaa. E no taua ōhipa ra ua faanahohia te tahi mau farereiraa e te mau faatere o te fenua e te tahi mau aratai no te oraraa poritita e te mau aupupu e tae roa atoà atu i te mau taata tumu iho no te fenua Taratoni.

### Te tau no te faaineineraa ?

Mai te matahiti 1979 to te Apooraa Rahi a te Etaretia Evaneria no Taratoni faaotiraa e ia faaineinehia te fenua no te tiamaraa. Mai taua taime ra e rave rahi mau ōhipa rarahi tei tupu ; te vaira tei faatupu i te peāpeā e te inoio i roto i te āau e tei nane roa i te mau tuātiatiraa i rotopū i te mau nunaa e ora ra i niā i taua fenua ra. Ua tupu atoà te mau āroraa e te mau taparahi raa taata. E i te matahiti 1988, ua tārima te mau pupu atoà i te parau faaau, e ia faaineinehia te nunaa o teie fenua no te faaoti i tō na iho parau i muri aē i na matahiti e 10. O te matahiti 1998 tei tapāohia no taua tapura ōhipa ra. I roto i teie tere i te fenua Taratoni, nā roto i te mau farereiraa tei tupu, e tiā ia parauhia e aita teie parau i faaea i te tuataparaphia, no te mea ua vai noa te mau taata i roto i te manāonāoraa e e aha te ōhipa e tupu mai ia tae i taua taime ra. E ia hiō amui-noa-hia te vai nei tei ineine no te haapāpū i tō ratou manāo, area te tahi pae ra tei roto ā ia i te taa-ōre. E te vai atoà ra tei parahi noa i roto i te matau, no te pāpū-ore ihoā i te mea e tupu mai ia oti te maitiraa no te 1998. E teie manāo oia hoī no te mau taata ihoa ia tei ōre i hinaaro ia haamata faahou te mau āroraa ia au mai tei tupu i te matahiti 1984. To rātou manāo, oia hoī eiaha te pae e pau i roto i teie maitiraa ia faatupu nā roto i te puai i te mea tei ōre i faariihia e te pae rahi. E nā reira atoà te pae e upootiā eiaha atoà ia e faairi i te tahi pae ei faahamāraa nā rātou, e ei faatiti atu ai ia rātou.

### Te tau no te ōōtiraa ?

No te pāhonoraa i teie parau ua rau atoà te mau manāo, te vai nei tei haapāpū e, e maoro mahana noa, e ia tae i taua taime ra ua ineine rātou no te rave i tā rātou mau tuhaa ōhipa. Nō te tahi pae ua vai rātou i roto i te manāonāo, e e aha te ōhipa e tupu mai ia tiāmā noa atu tō rātou fenua. E teie manāo nō te faaiteraa ia i te inein-ōre o te Taratoni i te haapāoraa i tō rātou oraraa, eiaha no te mea e feia pōiri, no te mea ra aita ratou i tauturuhia i te faaineineraa i te haapāo ia rātou iho. Ua poto roa atoà te taime i faataahia nā rātou. No reira te manāo ra ratou e mea maitai aē paha e faanuu faahou i te matahiti maitiraa, e faataa faahou i te tahi ā taime ē atu. Ia rave maitai te taime no te faanahonahoraa i te oraraa o te fenua e to te nunaa. Eiaha ra ia rū-noa-hia a tupu te tahi mau fifi i muri mai, tei ōre i arahia atu.

E i roto i teie nei mau fifi te vai ra ia te pae no te faaineineraa, te haapiiraa i te nunaa. Tei reira te taupupu o te tahi tuhaa rahi no te nunaa kanak, i te mea ua tafifi rii te mau haapiiraa tei haapāohia nō rātou, nā roto i te rave-ōre ihoā o te mau raveā i faataahia nō rātou. Aita rātou i fānāo i te mau raveā atoā ia pāpū te parau no tō rātou faaineineraa, inaha e rave rahi feiā āpi nō te nunaa kanak tei ōre i taeāhia ia rātou te tahi faito maitai i roto i te mau haapiiraa teitei. Ua tāmatahia e faatitiaifaro i taua fifi ra teie rā noa atu te mau raveā i faaōhipahia, i roto i te hiōraa a te tahi pae, aita ā i rave maitai, mea titauhia rā ia faaravaī ā i te taime no teie tapura ōhipa.

### Aita tā te tau e parau ?

I te fenua taratoni, e au ra e aita tā te tau e parau. O ia mau i te taime a faataahia ai e 10 aē matahiti no te nunaa o teie fenua no te faaineine ia na no teie maitiraa e e aha tā na huru totaiete e hinaaro, e faanahoraa papaā tei tuuhia i niā i teie nunaa, te nunaa kanak ihoa rā. Te tumu, no te mea, i roto i te faanahoraa tumu a teie nunaa, e ēre nā te tau e faataa i tō ōe ineineraa no te rave i te tahi ōhipa. E ēre roa atu. Nā to ōe ihoā rā manaō, o ia hoī ia tae i te taime ta ōe i faataa e rave ōe i tā ōe ōhipa ua rave oe. Nā mua aē, ua hape ia, e ia na muri mai ua taere roa. No reira nā oe e maiti i te taime tano, e ere ra na te ōhipa e faataa mai, e e ere atoā hoī e nā te tahi atu mau taata. Teie te tahi haapiiraa rahi tā te nunaa kanak e haapii noa nei i tō te ao, aita rā tātou e haapāo atu ra. No te mea ua tāamuhia tātou i niā i tō tātou mau uati. E ia hiō tatou i teie parau e haamanāo noa na vau i te haapiiraa a te Orometua tuiroo o Haveā no te fenua Tona, tei rave na i te hohoā no te haari no te tatara i tona manāo i niā i te parau no te taime tā te Atua i maiti no te haere mai i rotopū ia tātou. Te parau ra o ia e mai te haari, tei ōre roa e pāpū ia tātou i te taime e topa mai ai o ia nā niā i te tumu. O ia atoā te Atua ia haere mai i rotopū ia tātou, eia e roa ia tātou i te tuatāpapa i te taime tano. Nā te Atua ihoā rā e maiti i te taime ma te ani-ōre mai i tō tātou manaō. No reira no te nunaa kanak, e ere mea faufaa te tau e tano ai e haapāpū nā roto i te maitiraa i te huru oraraa tā rātou e hinaaro. Te mea faufaa roa atu rā ia tae i taua taime ra, ua ineine rātou i te rave i te faaotiraa tano.

Ralph Teinaore